

## **Í yu'xarij ti hua'puaj a'ín ti jo'yú'xaca' i San Pablo ti'ij i Timoteo huata'ítyi'**

### *Pablo pu jatyojtye'*

<sup>1</sup> Nyáaj Pablo, i nyaj jahuiire' i Ciríistu', Dios pu juxié'vi'ra' jin na'antýíhuoj, a'íjna jime' i ti a'yan tya'tóoratziiri' ti taatá'an tyaj júurij tá'ra'nyij jusén jime' jamuán i Ciríistu' ti Jesús pué'een,

<sup>2</sup> a'yaa nu ya tyí'muatyojtye' muéetzij Timoteo mu paj nyiyóoj pué'een. Che' i Dios ajta i Ciríistu' ti tavástara' pué'een, miche' a'ín tyámua' tyimuáacha'ín, majta muá'ancu'vaxi'ín mej mij tyámua' tyimuaatyápua'ritye'en mua' tzajta'.

### *Tyu'taxájtaj a'íjci jitze ma'can i Ciríistu'*

<sup>3</sup> A'náj tina'aj nu mua'tamuá're'rii nyati'ijta jahuocaj, tújca na'ríij tíca', a'yaa nu tyé'tyojtzí're' i Dios, i nyaj jimí tyámua' éenye'ej tyí'huiire', a'yájna mati'ij majta tyí'huiiria'ca'aj i nyahuásimua'ci'ij.

<sup>4</sup> A'náj tina'aj nu mua'tamuá're'rii i paj acá'yi'nya'aj, a'íj nu jin a'yan tyá'xie've' nyaj muaaséj, nyej nyij huatányetyamua've'en.

<sup>5</sup> Ji'nye a'yaa nu tyá'mua'reej paj tzáahuatyí'ra'aj jin tyá'tzaahuatye'. Anaquéej pu a'yáacuari' Loida tyá'antzaahuaj ajta a' náanaj Eunice, a'yaa nu nyij nyajta tyámua' naa

tyá'mua'reej paj a'yan cha'taj pana'aj muáaj tyá'tzaahuatye'.

<sup>6</sup> A'íj nu jin a'yan tyí'mua'ixaatye' paj quee jatyáxa'huata'an je'ej ti i Dios tyimuaatá' nyati'íj mua'vá'muariej i nyamuáca' jime'.

<sup>7</sup> Ji'nye capu i Dios a'íjna jin ju júuricamej taatá' tyej tyij tyí'tziinye'ej, sulu tyej tyij a'íjci jitze arátaca'nyej, tyej tyij tyajta huo'xié've'en, tyajta tyámua' metyityoomuámua're'ej.

<sup>8</sup> Capáj atyevi'ra'aj paj tyámua' tyihuó'ixaatye'en i tyeítyee jitzán ma'can i tavástara', capáj pajta atyevi'ra'aj nyajime' a'íjna jime' nyaj námi'. Sulu a'íj paj jitze je'ej ti i Dios tyimuaatá' pajta a'íjna jime' i paj jaxaamuijritye' pej mij jéetze' jáanamuj i nyúucaria'ra' i Dios.

<sup>9</sup> Dios pu tajapuá huatanyúj ajta taatajé tyej tyij jitzán ajtyama'cáantaj tá'ra'nyij, capu a'íjna jime' tajapuá huatanyúj je'ej tyaj tyi'tíj huáruuj, sulu a'yaa pu arí anaquéej tyaaxá'pui'intaria'ca'aj, ajta a'yan tyí'taxie'va'ca'aj jájcuaj imuáj, a'íjna jitze ma'can i Ciriístu' ti ajta Jesús pué'een.

<sup>10</sup> A'íjna i ti jin taaxié'vej ijíj pu arí huataséjre a'íjna jitze ma'can i Ciriístu' ti ajta Jesús pué'een, a'íj pu ja'antypuá'rij i maj jin cui'caa, ajta i junyúucaa jin taataséjra i tyaj jin júurij tá'ju'un jusén jime'.

<sup>11</sup> Dios pu na'antyhuj nyej nyij huo'té'exaatye'en i tyeítyee i nyúucaria'ra', ajta nyej nyij jimi tyu'tyáhuire'en, nyajta tyihuó'mua'tyej.

12 A'íj nu jín nyáaj a'yan tya'ajpuéjtzij. Ajta canu nyetyevi'ra' a'ájna jime', ji'nye nyáaj nu jamua'reej a'tíj nyaj jitzán tyí'ca'nyej, nyajta a'yan tyá'mua'reej ti a'yan tyinaatá'sij a'ájna xicáara' jitze je'ej ti tyi'tíj nye jimi tya'taráj.

13 A'yaa paj huárinyij pajta a'yan tyihuó'mua'tyej je'ej paj tyi'tíj tya'ancuriáa' nyéetzij jimi, pajta a'yan tyu'mé'en je'ej tyej tyá'tzaahuatye', pahua'xié've'ej a'yájna ti'ij i Ciriístu' tyitaaxié'vej ityájma.

14 A'íi pu muaatáhuire'ej i júuricama'ra' i Dios i ti tatzájta' séejre', tyámua' paj tyéecha'íin je'ej ti tyi'tíj jín tyimua'antyíhuoo.

15 A'yájna pati'ij períj tyá'mua'reej, néijmi'i i maj Asia ja'chej a'íi mu manúuriej, a'íi mu hua' jitze ajtyáma'can i Figelo, ajta i Hermógenes.

16 Che' i tavástara' hua'ancu'vajxi'in i tyeítysteristyamua'me'en a'íjci i Onesíforo, ji'nye jéehua pu yetyinyavá'tuiiri' i nyaj jín huarúj, ajta quee jaatatyévi'rastej nyaj eetyánami'huaj.

17 Ajta ti'ij i Onesíforo a'áa ja'rá'aj a Roma, a'íi pu huatyóochej ti náahuonyij 'asta na'aj quee náatyoj.

18 Che' i tavástara' jéehua ja'ancu'vaxi'in a'ájna xicáara' ti jitzán uvé'nyesij. Muáaj paj tyámua' tyá'mua'reej ti taatáhuíi a'ájna a Éfeso.

## 2

*Síj ti a'yan tyá'huire' ti'ij xantáaru' a'íjci i Ciriístu'*

1 Pajta muáaj nyiyóoj, pata'aj huatyá'ca'nyej a'tzájta' a'íjna jime' je'ej ti i Dios tyimuaataséjra a'íjci jitze ma'can i Ciríistu' ti ajta Jesús pué'een.

2 Je'ej paj períj nyéetzij tyináanamujri' nyaj a'yan tyihuó'ixaaaj i tyeítjee, a'yaa paj tyi-huo'íjcatye'en a'íjma i tyétyacaa i paj hua' jitze tyí'ca'nyej mej mij majta a'yan tyihuó'mua'tyej i séecan.

3 Pata'aj tajamuán tyo'táviicue' a'íjci jime' i paj jajpuéetzij tí'ij i xantáaru' ti tyí'huire' jimi i Ciríistu' ti ajta Jesús pué'een.

4 Capu síj xantáaru' a'yan ricij je'ej ti jusíj tyá'xie've' tyí'tíj jime', jí'nye a'yaa pu jitzán tyúuxie've' tí tyámua' tyu'tyá'itzeere'en a'íjci jimi i ti tyé'ijtye'.

5 A'yaa pu ajta tyí'een a'ímaj jimi i maj hua'ajcacia, a'íjna i ti huajcaj capu tyí'tíj mue'tin, tipua'aj quee a'yan tyu'tatyése'en je'ej tí tyí'huóoxie've'.

6 A'íjna i tyí'muijhuacaa i juchuáj japua, a'yaa pu tyu'táci'pej tí a'ín anaquéej tya'ancuriáan i tí tyú'ciítjej.

7 A'íj paj jitze tyú'mua'tyij je'ej nyaj tyí'mua'ixaatye', jí'nye i tavástara' pu muaatá'sij pej pij tyámua' tyiyo'itéej puá'ra'nyij.

8 Ootámua'reej a'íjci i Ciríistu', i tí hu-atájuuriaca' a'íj tí jitze eeráma'can i David, a'íi pu a'ín pué'een i nyúucarij i nyaj huá'ixaatye'.

9 A'íj nu jin néijmi'i tyé'viicue' i nyaj jajpuéetzij, nyajta eetyánami' tí'ij síj tí tyí'tyacui'caa, ajta i nyúucaria'ra' i Dios i nyaj jaxaj capu eetyánami'.

10 A'íj nu jin néijmi'i tyo'táviicue'ri' néijmi'caa jimi i Dios ti hua'antyíhuoj, ti'ij ajta a'íjma huáhuire'en ajta i Ciríistu' ti ajta Jesús pué'een hui'rátoonyij, mej mij jusén jin jimi séjria'aj.

11 A'íjna pu a'yan tyi'ji'récán jime' ti a'yan tijin:

Típua'aj jamuán táacui'nyij, jamuán tu tyajta júurij ta'mej,

12 típua'aj tyetyo'táviicue' i tyaj jajpuéjtzij, jamuán tu tyajta tyu'ta'íjtaj,

típua'aj tyeetyáhue'taj, a'íi pu ajta ityájma taatyáhue'taj,

13 típua'aj tyequée tyámua' tyi'tyítacha'íij, a'íi pu a'náj tina'aj tyámua' éenye'ej ta'mej, ji'nye capu i'ríj ti jusíj huatyóohue'taj.

*Je'ej ti ye'ej tyi'tyúucha'íij a'íjna i Timoteo*

14 Huo'támua'ree i séecan pajta i Dios jimi huo'tyátoonyij, mej mij quee jujímua'aj je'ej pua'aj tyúujeevej. Capu tyi'tíj huire', a'yaa pu'uj je'ej pua'aj huá'uurej a'íjma i maj janamuj.

15 A'yaa paj jéehua tyí'tyese'ej paj a'yan tyu'tá'sejrataj i Dios jimi, ti'ij síj i maj a'yan tyaataxájtaca' tijin xá'pui' pu huaríj, ti'ij síj ti tyí'muijhuacaa tiquee tyi'tíj jin jutyevi'ra', ajta a'yan tyámua' tyihuá'mua'tyej a'íjci i nyúucarij ti a'yan tyi'ja'yájna.

16 Capáj janamujra a'íjci i nyúucarij tiquee je'ej huatóomua'aj, ajta quee tyi'tíj xaj, ji'nye a'íimaj i maj a'yan tyí'xaj, jéetze' mu je'ej pua'aj tyityetyúucha'íj,

17 ajta je'ej maj tyihua'mua'tyej jéehua pu je'ej pua'aj tyú'uurej. A'yaa pu tyí'ricij a'íjma jimi i Himeneo ajta i Fileto,

18 i maj meríj a'yan tyitya'ajtacíj i nyúucarij jitze ti a'yan tyí'ja'yájna, a'yan metyi'xáataj tíjin muríj huatájuuriaca' i mui'chítýee, a'yaa mu mij meríj séecan tye'entyí'uunyi'ri' je'ej maj tyá'tzaahuatye'.

19 Ajta i Dios a'yan tyi'tíj huáruuj, tyej tyij jitzán arátaca'nyej, ajta jitzán a'yan tyé'yu'si' tíjin: Tavástara' pu huá'muajtyej i maj jitzán ajtyáma'can"; ajta a'yan tíjin: "Néijmi'i i maj já'astijre' i tavástara', miche' ajtáciiñyey a'íjci jitze i ti je'ej pua'aj een."

20 I chí'ij tzajta' ti ve'éj, capu a'íi na'aj tyó'sejre' i ooroj ti jin tyí'taavijhua nusu i pláataj jime', sulu ajta pu tyó'sejre' i ciyéj ti jin tyí'taavijhua, ajta xaríj jime', séecan pu a'yan tyí'huiire' mati'ij tyí'ye'estyaj, ajta séecan cha'na'aj pu'uj tyi'tíj jin tyí'huiire'.

21 Tipua'aj a'tíj a'yan eenye' tiquee tyi'tíj jin á'itzeeria'aj, tyámua' pu séeria'aj ta'mej, ajta jéehua tyu'tyáhuire'sij i tavástara' jimi, néijmi'i jime' i ti xá'puí' een.

22 Pata'aj quee a'yan rijcaj je'ej maj tyi-tyetyúucha'ij i maj tyáamua, pata'aj jáahuonyij i ti naa een, i paj jitzán tyá'tzaahuatye', pajta tyámua' eenye' a'tzájta' a'íjma jamuán i maj tyámua' tyá'tzaahuatye' i tavástara' jimi.

23 Capáj huá'astyaj i maj cha'mana'aj tyí'xaj, papu'ríj jamua'reej ti a'yan na'aj tyí'huiire' maj a'íj jin tyúunyo'si'tye'en i tyeítýee.

24 Ajta síij ti tavástara' jimi tyí'huiire' capu a'yan tye'tyévijtye' ti a'yan éenye'que' jo'cha'canye'en, sulu che' tyámua' tyi'tyúucha'ij néijmi'caa jimi. Ajta jaayí'tihua'an ti tyihuó'mua'tyej, ajta quee nyu'camu'ij tyo'táviicue'

25 ajta quee ootzáahuatye'ej tyámua' huó'uurej a'íjma i maj quee tyihuojó'itej, ajta tyi'ijchó've'ej ti i Dios huo'tá'an mej mij seequéj tyú'mua'tyij, majta jáamua'reej i nyúucarij ti a'yan tyi'ja'yájna,

26 ti'ij huatái'riitarej maj iiráciinyej jo'tij tyiyáaru' hueje'tyáanaj, jo'tij a'íin a'yan tyiyá'xie'va'ca'aj maj ja'rá'astijre'en.

### 3

*Je'ej maj tyityetyuucha'íj muá'ju'un i tyeítyee ti'ij néijmi'i tye'entyipúa'rij*

<sup>1</sup> A'yaa pu ajta tyúuxie've' paj jamua'reeriaj ti a'yan tye'mej ti'ij néijmi'i tye'entyipúa'risime'en ti jéehua je'ej pua'aj tyi'éenye'ej ta'mej.

<sup>2</sup> Capu hua' jitze juxié'va'aj ta'mej je'ej ti tyihuá'uurej i séecan, majta jéehua jaxie'va'aj muá'ju'un i túmii, majta jéehua óotzaahuatye'en, majta huo'tyáxaahuataj i juxa'aj tyeítyee. Je'ej mu pua'aj tya'xáataj muá'ju'un i Dios, majta quee huá'tzaahuatya'aj muá'ju'un i juhuásimua', camu tyámua' tyihuo'tá'sij a'íimaj i maj tyi'tíj jin huo'tyáhuu, majta quee tzáahuatyi'ra'aj tyicha'íj muá'ju'un i maj jitzán tyá'tzaahuatye'.

<sup>3</sup> Camu hua'xie've'ej muá'ju'un i tyeítýee, camu majta hua'cu'váaj muá'ju'un, sulu jéehua mu je'ej pua'aj tyuuxáataj muá'ju'un, majta a'yan rinyij je'ej ti tyihua'ráanajchi, mejcha'íria'aj mu muá'ju'un néijmi'i i ti xá'puí' een.

<sup>4</sup> Avíitzij mu jin tyu'tátuiire'sij i juxa'aj tyévij majta quee oocu'váaj muá'ju'un, jéehua mu ootzáahuatye'ej muá'ju'un, a'íjna jime' ti a'yan tyihuá'miteeraste' maj jéehua juxie've', majta a'íj huoonyij maj a'yan huárinyij je'ej ti tyihua'ráanajchi, camu jaxie'va'aj muá'ju'un maj jáahuoonyij i Dios.

<sup>5</sup> A'yaa mu tyuuséerataj muá'ju'un i tyeítýee jimi, ti'ij i maj já'astijre' i Dios, ajta camu a'yan ricij je'ej maj tyí'xaj.

Capáj huá'jaahuatye'ej a'íjma i tyeítýee maj a'yan ricij.

<sup>6</sup> Ji'nye a'íjma mu jitze ajtyáma'can i maj hue'tzij jin utyáru'pij u hua' chi'táj i tyeítýee, majta huá'cuanamuaj a'íjma i úucaa i maj quee tyé'viicue' i jutzájta', i maj juxaamuijritye' a'íjna jime' i maj ootyá'itzee i Dios jimi, majta jéehua tyi'ijxána'cira' a'íjna jime' maj a'yan ricij je'ej ti tyi'táj tyihua'ráanajchi,

<sup>7</sup> a'náj tina'aj mu huá'namuaj i maj tyihuá'mua'tyej, ajta camu a'náj yo'itéej muá'ju'un i nyúucarij ti a'yan tyi'ja'yájna.

<sup>8</sup> Ajta a'íimaj i tyétyacaa Janes ajta i Jambrés a'íi mu a'yan cha'taj mana'aj tyé'ejcha'íria'ca'aj i Moisés, a'yaa mu majta tyéjcha'íire' i nyúucarij ti a'yan tyi'ja'yájna. A'íi mu pué'een i maj



je'ej pua'aj metyityoomuámua're', majta quee tzaahuatyí'ra'aj jin tyá'tzaahuatye'.

<sup>9</sup> Camu che' á'tyeeren i maj a'yan ricij, ji'nye néijmi'i mu jamua'reeren ti'quee tyi'tíj huíire' je'ej maj tyí'xaj, a'yájna tí'ij tyihuó'ruuj a'íimaj i maj hua'puaj i maj jájcha'íiria'ca'aj i Moisés.

*Pablo pu tyé'ixaatye' i Timoteo*

<sup>10</sup> Pajta muáaj a'yaa paj tyámua' naa tyu'mé'en je'ej nyaj tyimuaamuá'tyej, je'ej nyaj éenye'que' jo'cha'can, je'ej nyaj tyí'muijhuacaa, je'ej nyaj tyá'tzaahuatye', nyajta tyé'viicue' tyámua' naa i nyaj jin jajpuéjtzij,

<sup>11</sup> muáaj paj jamua'reej maj je'ej pua'aj náaruj, nyajta jéehua jajpuéetzij, a'yájna mati'ij náaruj a'ájna a Antoquíia, majta a'ájna a Iconio, majta a'ájna a Listra. Jéehua nu jaapuéjtzitariaca'. Ajta nyavástara' pu néijmi'i jin naatáhuíi.

<sup>12</sup> A'yaa pu tyi'ja'yájna tíjin a'tíj tí na'aj tí tyí'tyese' tí ja'rá'astijre'en i Ciríistu' tí ajta Jesús pué'een, jéehua pu jajpuéetzij ja'mej,

<sup>13</sup> ajta a'íimaj i maj je'ej pua'aj tyityetyúucha'ij majta i maj huá'cuanamuaj i tyeítjee, móoche' mu jéetze' je'ej pua'aj rinyij i jutzájta', séecan mu i tyeítjee huá'cuanamuan, majta jujíimua'aj tyo'tyóohue'tze'sij.

<sup>14</sup> Pajta muáaj, a'yaa paj pooj tyá'tzaahuatye'ej je'ej paj tyaari'rej, pajta a'yan tyá'mua'reerej tí a'yan tyi'ja'yájna. Pajta jamua'reej a'tyán maj a'yan tyimuamuá'tyej.

<sup>15</sup> Ootámua'reej patí'ij pa'ri'istaca'aj, tyámua' paj tyá'mua'reej je'ej tí tyé'yu'si' i yu'xarij jitze Dios tí janyuucaa, a'íi pu a'íin

pué'een i nyúucarij ti muaatá'sij paj tyámua' metyóomua'riaaj, ajta ti'ij muáahuiire'en a'íjna jime' paj tyá'tzaahuatye' i Ciriístu' jimi ti ajta Jesús pué'een.

<sup>16</sup> Néijmi'i i ti tyé'yu'si' i yu'xarij jitze, Dios jimi pu já'ma'can, ajta a'yan tyí'huiire' mej mij a'íj huo'mua'tyej majta a'íjna jin tyámua' huó'uurej i tyeítyee, mej mij a'íjna jitze huo'té'exaatye'en i maj jin ootyá'itzee i Dios jimi, ajta mej mij jiréenya'aj muá'ra'nyij i jutzájta',

<sup>17</sup> ta'aj ij a'íjna i tyáati' i ti Dios jitze ajtyáma'can tyámua' eenye'en ti'ij a'yan huárinyij néijmi'i jime' je'ej ti tyí'xa'pui'.

## 4

<sup>1</sup> I Dios jitze ma'can, ajta i Ciriístu' ti Jesús pué'een, ti a'yan uvé'nyesij ti'ij tyu'ta'íjtaj a'íjma jimi i maj a'yan huacháatimee i cháanacaj japua, ajta a'íjma jimi i maj merij huácuij, a'yaa nu jéehua tyí'mua'ijcatye'

<sup>2</sup> paj huó'ixaatye'en i nyúucarij, pajta huo'táhuaviij mej mij tyámua' tyáanamuj, tipua'aj a'yan metya'xie've'ej, na'riij mequee. Pata'aj huo'tyámue'tij, pajta huo'tá'ijmuj mej mij quee je'ej pua'aj rijcaj, ca'nyíjra'aj paj huo'tá'an, pajta xájtari' naa tyihuó'mua'tyej.

<sup>3</sup> Ji'nye a'náj pu atyojo're'nyesij mati'ij i tyeítyee quee che' janamuáaracuj muá'ju'un i maj xá'pui' tyihuá'mua'tyej, sulu a'yaa mu mui'caa tyu'tájeevij i maj tyihuá'mua'tyej, mej mij a'íjna huó'ixaatye'en je'ej maj tyi'tíj tyi'namuajracuj.

<sup>4</sup> A'íi mu jaatyáxaahuataj i ti a'yan tyi'ja'yájna, majta a'íjna ántzaahuatye'sij i nyúucarij tiquee tyi'tíj je'ej tyi'xaj.

<sup>5</sup> Pajta muáaj tyámua' paj eenye', pata'aj tyo'táviicue' i paj jin jajpuéjtzij, pajta pooj huá'ixaatya'aj i nyúucaria'ra' i Dios, tyámua' paj naa tyu'muárie'en a'íjci jime' i paj jin tyí'huüre' i Dios jimi.

<sup>6</sup> Pu'ríj nye jimi a'yan tye'mej nyej nyij a'yan tyu'tyáhuüre'en tí'ij mu'vejrij, ajta arí atyojo're'nyesij a'náj nyaj mui'nyij.

<sup>7</sup> Jéehua nu nyeríj tyámua' tyu'tyéenyosej nyej nyij a'yan huárinyij je'ej ti tyí'xa'pui' i Dios jimi, a'íj nu jin nyeríj ja'antyci'íj i nyaj jin antyínyamua'ree, nyajta néijmi'i jin ja'rá'astijrej i nyavástara'.

<sup>8</sup> A'íj nu'uj nyij tyicho've' i cúruun i nyaj jaamué'tij a'íin ti naatí'tye'sij i nyavástara', ti tajtúhuan jin tyi'tyéjvee, a'ájna xicáara' ti jitzán a'yan tyaaxá'pui'intarej nye jimi. Ajta capu nyéetzij na'aj naatí'tye'sij i cúruun, sulu néijmi'caa i maj a'yan tye'ejchó've' ti a'íin uvé'nyej huápu'i'ij naa huasé'rihua'aj.

*Pablo pu tyámua' naa tyé'ixaatye' je'ej ti ye'ej huárinyij i Timoteo*

<sup>9</sup> Pata'aj huatá'ca'nyej paj ca'nácan yanatyéesej,

<sup>10</sup> ji'nye i Demas, a'íj pu jéetze' tya'ránajchaca' íiyan ti tyí'sejre' i cháanacaj japua, a'íj pu jin manúuriej tí'ij ij a'áa jo'mej a Tesalónica. Ajta i Crescente a'áa pu jó'raa a Galacia, ajta i Tito a'ájna a Dalmacia.

11 A'íi pu'quij i Lucas nyaj jamuán yahu-  
atyá'itzee. Pata'aj jáahuonyij i Marcos pajta  
muya'rávi'tij ajamuán, ji'nye a'íi pu jéehua  
naatáhuíi i nyaj jin tyí'muarie'.

12 Nyajta a'íjci i Tíquico nyaata'ítýaca' a'ájna  
a Éfeso.

13 Pati'ij mu ja'rájra'nyij mu paj  
nyaja'rachuítýe'en i nyamáancaj i nyaj a'áa  
yoohuá'xij a Troas, a'ájna a Carpo ti ja'chej, pajta  
mu tyinyaja'rápijtye'en i yu'xarij, pajtáhua'aj i  
séecan i yu'xarij ti tyí'jiri' nyéetzij ti tyí'nya'a'rij.

14 Ajta a'íjna i Alejandro tyapúusti'ij ti  
tyí'ta'huacaa, jéehua pu je'ej pua'aj náaruj, i  
tavástara' pu a'yan tyá'najchitye'en je'ej ti tyí'táj  
huáruuj.

15 Tyámua' paj tyi'huá'cha'íin a'íjci jimi,  
ji'nye jéehua pu jájcha'íire' i nyúucarij i tyaj  
huá'ixaaty'e' i tyeítýe'e.

16 Nyati'ij anaquéej nyaj japua huatanyúj  
a'íjma jimi i maj tyityatatyíj, capu a'táj  
naatáhuíi, néijmi'i mu manúuriej. A'yaa nu  
tye'ejchó've' ti i Dios quee puéjtzij hua'tá'care'en  
a'íjci jime' je'ej maj huaríj.

17 Ajta i nyavástara' pu naatáhuíi ajta  
ca'nyíjra'aj naatá', a'íj nu jin huo'té'exaatye'ej  
i tyeítýe'e i nyúucaria'ra' i tavástara', mej mij  
néijmi'i jáanamuj a'íimaj i maj quee Israel jitze  
ajtyáma'can. A'yaa pu a'íjna jin i nyavástara'  
tyini'rájtoo ti'ij quee tyi'táj je'ej nyoorej,

18 ajta ooj a'yan tyi'nyahuíire'ej ta'mej néijmi'i  
jime', ajta ná'vi'tin u jútye' jo'tij a'íin tyejé'íjtaj.

Tyiche' a'náj tina'aj tyé'tyojtzi're'ej. Che' a'yan tyá'ra'nyij.

*I ti jin ja'antypuá'rij*

<sup>19</sup> Pata'aj nyaj jime' huo'tatyójtje' a'íjci i Prisca, pajta i Aquila, pajta néijmi'caa i Onesíforo maj jamuán aja'chej.

<sup>20</sup> Ajta i Erasto a'áa pu jo'tyá'itzee a Corinto, nyajta i Trófimo a'áa nu yo'tyájtóo tyi'cuí'can a'ájna chájta' Mileto.

<sup>21</sup> Pata'aj huatá'ca'nyej paj yatanyéj ti'ij quee eexúj huáseevi'ij. A'íi mu yámuatyojtje' i Eubulo, ajta i Pudente, ajta a'ájna i Lino, ajta i Claudia, majta néijmi'i i ta'ihuáamua' maj tyá'tzaahuatye'.

<sup>22</sup> Che' i tavástara' muéetzij jimi huatyá'itzeere'en, ajta i Dios jéehua tyámua' tyajamuaatá'an néijmi'caa mua'ajmaj.

**Cora, Santa Teresa**  
**Cora, Santa Teresa: I nyúcarij ti jájcua ti a'ijna**  
**á'xaj i Tavástara' i Jesús ti Ciríistu' pue'een ajta**  
**Salmos New Testament+**

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

---

PDF generated using Haiola and XeLaTeX on 30 Apr 2025 from source  
files dated 1 May 2025

4f03662f-a4e0-5c7c-a13b-0b7002b5b8f6